

■ COLUMNA

Nasdrowje!

DA ROMANOW CAVIEZEL, CUIRA

Ils Russ vegnan! Sin il Gelgia! – Nua è il problem? Putins e Vekselbergs, Suworows ed Abramows, quai è bain glied sco nus. Bun, in zic mafosis, quai schon, aber da quels datti er tar nus en il Grischnun, nevair? Na, sincer, jau sun inchantà che noss zarin indigen, Giovanni l'Emprim da Riom, e ses assistent, il castellan cotschen da Rietberg, han finalmain fatg fin cun la bandischada dals Russ da noss pajais. Igl è stà neras uras. Passa 100 onns avain nus stuvì spetgar enfin ch'ìls communists, quels smaladids assassins d'uffants e violaders da dunnas, n'èn betg pli da la partida. Perquai datti uss er ina gronda festa da commemoraziun dals bels temps passads. Sin il Gelgia, en la tur dal zarin. Trais lungas notgs – e betg mo miserablas duas sco tar Nicolai a Leningrad, preschinie, Sogn Petersburg – cun banchets e bals e tut quai ch'in dretg cor da promis giavischa.

Eper betg stuvair festivar be tranter els, dastgan uss er baruns e tribuns grischnuns sa participar. Suletta cundiziun: avunda pinchis. Speranza n'hai lur betg mo impresaris engiadinais! E naturalmain in fin sensori per la grondiusa cultura russa. Jau vuless eba er ir,



pertge ch'i custa mo milli francs per saira. Per nus auters ina piculezza, quai prendain nus luc da la cassa da porto.

Aber in quità hai jau schon. Areguard il menu: jau n'ai betg gugent russers! Nundir tut quai urden da pastiziers, pups da mungias e consorts. Fatgs en chasa da la tatta va gea anc, aber preparads da Russ e cun tgi sa tge spezarias exoticas, na, grazia. Persuenter sun jau brutal fan da vodka. La frestgera va suorra da tuttas sorts buttiglias. Mia marca preferida: Kalaschnikow Red Army, 210.- il set. Dapi in mais trenesch jau bunamain mintga saira da baiver, per lur far buna figura a la festa. Il problem è mo ch'i va anc dus mais e mia dunna ha schon smanatschà da laschar spartgir sche quai na mida betg bainprest.

Pazienza. Anzi, jau hai cunterattatgà: vodka

cunter casatschok! Il bal russ è numnadain sia passiuin, e jau al hai ditg cler e bain: Sche ti na ma laschas betg il vodka, pos ti ballar suletta tes casadingsbums sin il Gelgia. Uss fashain nus mintga saira l'emprim ensemen il bal e jau suenter il vodka.

Cun il dress-code hai jau dentant nagin problem: «1900». Il vestgì da dumengias da mes tat è schon semtgà en scaffa: ina schicca mandura naira, forsa in zic greva per il fanadur, persuenter cun in elegant libroc suten ed ina bellezza ura da giaglioffa. Ils chalzers cun capaneghels hai jau er schon empruvà, i van stupent per ballar il casatschok. Quai vegn cool, mann.

Quest Giovanni è simpelmain in fegher. Jau al perdun che l'occorrenza n'ha da far quest onn nagut cun la bibla. Nagina Regina da Saba, persuenter datti uss usché ina super party, unica e tschientenara, cun Russ e tut il climbim. E betg forsa per guadagnar raps, na, per ina buna chaussa! Benefiz, per cumprar novs hislis e insaquantas loschas marschas en la tur! E na emblidar: in ascensur per hosps cun handicap (da golf, mettain). Grazia fitg, zarin, e nasdrowje!